



Ils oraturs da festa Marina Carobbio, presidenta dal cussegl nazional, e Martin Gabriel, secretari general da la LR flanchegiads dal salter e da la moderatura e dama d'onur.



Il Cantus Firmus Surselva ha impressiunà tras in concert sin fitg aut nivel musical.

FOTOS M.WENDT

# Gronda vitalitad, malgrad signals da digren

Festa da giubileum da la Lia Rumantscha cun plects festivs, concerts, chant communabel e bal

DA MARTIN CABALZAR

■ La Festa giubilara da la Lia Rumantscha a Zuoz è vegnida terminada sonda e dumengia cun plects festivs e d'engraziament, concerts, chant communabel e bal. En in interessant exposé intitulà «Uniun dat forza» ha professor Rico Valär skizzà naschientscha e svilup da las numerusas uniuns rumantschas. Betg per nagut hai num che sche trais Rumantschs s'entaupian, contian els gia en quatter vuschs. Il chant



è allura era sa musa a la festa finala dal giubileum da la LR sco ferm element communabel e d'identificaziun tranter las differentas valladas rumantschas.

La festa da giubileum ha allura era demonstrà cun tutta evidenza che la cultura da chant e musica è fitg variada ed innovativa en la Svizra Rumantscha.

## Sedisptar per vegnir perina

En ses pled festiv ha il secretari general da la LR Martin Gabriel menziunà il grond sustegn e la gronda solidaritad per l'existenza futura da lungatg e cultura romantscha. El rom dal giubileum haja la LR vuli accentuar la muntada da las famiglias rumantschas cun deditgar a quellas in di tematic che saja stà frequentà fitg bain. Era il program da la GiuRu e ils visiuns naschidas al podi davart l'avegnir da la LR e sias uniuns affiliadas haja demonstrà chi na dettia betg mancanza

d'ideas e visiuns per il futur en terra rumantscha. Per la LR sajan questas discussiuns e sentupadas tranter personas da l'Engiadina, dal Grischun central, da la Surselva e da la diaspora da gronda impurtonza. Ellas muentian, dettian impuls e mettian bler en rocla.

Sch'el dastgassia exprimer in giavisch en connex cun il giubileum, lu fissi quai bieras, bunas e diras discussiuns, dettant en in'atmosfera che possibiliteschia da baiber da cuminonza ina gervosa fraida e far viva a la fin. «Ina biera fraida per far fin a la guerra fraida tranter adherents ed adversaris dal rumantsch grischun», di il secretari general Martin Gabriel.

La LR haja instradà la «strategia 100 plus» e vegnia ad approfondar questa lavur en il decurs dals proxims mais. Ton saja dentant tschert, la nova strategia stoppia vegnir purtada da la basa. Il rapport da l'Institut da democrazia ad Aarau dettia bain impurtants impuls, gist usche impurtants sajan dentant ils resuns retschavids ils ultims dis a Zuoz.

La finamira saja da frenar la digren dal rumantsch per che era las generaziuns vegnentas possian applitgar cun plashair il rumantsch. «Nus tuts, Rumantschas e Rumantschs, els intschess da tschep sco en la diaspora, essan dumandads da cumbatter per l'avegnir da nossa lingua e da prender ils meds necessaris persunter, concluda Gabriel ses appel.

## Lingua e cultura sco bain il pli prezios da la Svizra

En ses pled festiv ha presidenta dal cussegl nazional Marina Carobbio Guscetti accentuà che la lingua saja in dals ele-

ments ils pli impurtants per promover e francar l'identitad d'in pajais. En in pajais multiling sco la Svizra paria la lingua d'esser sin l'emprima egliada in privel per sparter las diversas regiuns linguisticas, tan pli che la quantitad numerica saja frappanta: 63 pertschient da la populaziun plaidan tudestg e 28 pertschient franzos, dentant che mo otg pertschient sajan da lingua taliana e mo gist 0,5 pertschient da lingua rumantscha. Plinavant chaschunia il territori sparpiglià dal talian e dal rumantsch difficultads supplementaras. Carobbio ha era constatà en quest connex che 40 pertschient dals Rumantschs na vivan betg en il chantun Grischun. Malgrad questa situaziun – ni forse gist perquai – saja la convivenza da pliras linguas e culturas ina fermezza da la Svizra. Il talian ed il rumantsch na sajan betg mo linguas, mabain era culturas autonomas che furmian el medem mument ils pilasters da la cultura svizra, puntuescha ella. Scadina da las quatter linguas naziunalas haja sia atgna identitad e sias atgnas tradiziuns e tuttas ensemen furmien la Svizra. Or da questa optica hajan la lingua taliana e rumantscha – independentamain da las personas che plaidan questas linguas – la medema impurtanza sco il tudestg ed il franzos.

«La plurilinguitad e la protecciun da las minoritads religiusas e linguisticas èn uschea – sper la democrazia directa ed il federalissem – facturs centrals da nossa identitad naziunala», accentuescha Carobbio. Malgrà quai sajan dentant tant il talian sco il rumantsch confruntà cun differents problems. Sco quai chi resorta dal rapport d'evaluaziun fatgs per in-

cumbensa da l'Uffizi federal da cultura sin fundament dal postulat da *Silva Semadeni* «exista per il rumantsch gia a mesa vista il privel d'ina smanatscha existenziala». La mobilitad da la populaziun haja effectua ina mischaida cuntinuada da linguas e stumplà pli e pli il rumantsch en il ravugl privat. Talas tendenzas periclitescian la coesiun naziunala, di Carobbio. Nossa varietad da linguas, culturas, religiuns, historias ed experienschas sajan numnadamain la pli gronda ritgezza da la Svizra, noss bain il pli prezios.

## Concerts e chant communabel

Per introducziun da l'act festiv ha la formaziun pitschna dal ensemble vocal Cantus Firmus Surselva sut la direcciun da *Clau Scherrer* dau in oreifer concert en la baselgia da s. Luci ferm occupada d'in publicum attent ed interessà. Durant 45 minutas ha il publicum gudi in concert sin aut nivel cun ina schelta da litteratura musicala sacrala e profana or da tut ils idioms rumantschs. Il publicum ha engrazià cun in applaus frenetic che na vuleva maina chalar. La punt musicala tranter l'Engiadina han allura era il Cor Proget 19 sut la direcciun da *Curdin Lansel* ed il Chor Surselva sut la direcciun da *Rest Giusep Tuor* fatg. Ils trais chors reunids han era intunà è sustegnì il chant communabel che ha enramà ils plects festivs sin il pittoresc Plazzet sper l'imposanta Chasa Planta enamez il vitg feudal da Zuoz.

## Per famiglias e giuventetgna

Il suentermezdi e la saira èn pliras furmazions da chant e musica sa preschentadas

al publicum. *Corin Curschellas*, ils Fränzlis da Tschlin han chantà e sunà chanzuns d'uffants allegras e tristas, curiosas e bellas. Al concert per famiglias han era cooperà *Anna Staschia Janett* (violina), *Christina Janett* (cello), *Madlaina Janett* (viola, illustraziuns), *Curdin Janett* (accordeon), *Domenic Janett* (clarinetta) ed *Justina Derungs* (gieu).

Tenor il motto «fo plaun, fo pauc, fo pausa» ha il Trio da *Pascal Gamboni* cun Pascal Gamboni (chant), *Severin Brugger* (ghit.) e *David Jemmi* (perc.) delectà il publicum el dialect tuatschin. Il duet Me+Marie secumpona da *Maria da Val* (percussiu, ghitarra e chant) e *Roland Scandella* (ghitarra e chant).

## Divertiment da la saira

Il divertiment da la saira è vegnì continuà cun Prefix, ina gruppa da rock d'Engiadina Ota cun elements da metal e punk culs musicists *Andri Casty* (voc.), *Rico Puorger* (ghit.), *Curdin Urech* (ghit.), *Christoph Casty* (bass), *Marco Niggli* (piano) ed *Andri Netzer* (perc). En la sala dal hotel Engiadina han ils Fränzlis da Tschlin envidà ils amatur dil saut e da la cumpagnia al bal. Sco giasts spezialis èn sa preschentads *Carlo Simonelli* (orchelet da maun) e *Gian-Carlo Simonelli* (clarinetta/giun).

Per l'ustria da festa en il center dal vitg han las uniuns localas da Zuoz procurà. Insumma han ils Zuozingers sut l'egida dal capo communal *Andrea Gilli* fatg tutta onur a ses renum cun l'organisaziun da la festa da giubileum tschientinar da la LR.



Il Cor Proget 19 ed il Chor Surselva han chantà cuminaivlamain e fatg la punt tranter Engiadina e Surselva.



Ils Fränzlis da Tschlin han envidà la saira la raspada rumantscha al bal.